



Sumáriu Kazu
Tribunál Judisiál Primeira Instánsia Oekusi
Outubru 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Oekusi

1. Totál kazu ne'ebé JSMP monitoriza: 5

Artigu	Tipu kazu	Númeru
Artigu 291 (KP)	Violasaun ba justisa nia segredu	1
Artigu 251 (KP)	Furtu simples	1
Artigu 316 (KP)	Kontrabandu	2
Artigu 263 (KP)	Inséndiu	1
Totál		5

2. Totál desizaun ne'ebé JSMP monitoriza : 3

Tipu Desizaun	Artigu	Númeru
Suspensaun ba pena prizaun nia ezekusaun	Artigu 68 KP	2
Absolve	-	1
Totál		3

3. Total kazu sira ne'ebé kontinua prosesu tuir JSMP nia monitorizasaun : 2

B. Deskrisaun sumáriu julgamentu ba desizaun kazu sira

1. Krime kontrabandu

Nú. Prosesu : 0192/22.OESIC
Kompozisaun Tribunál : Kolektivu
Juis : Dra. Florençia Freitas
: Dr. Benjamin Barros no
: Dr. Yudi Pamukas

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

Prokuradór : Dr. Pedro Baptista Aleixo dos Santos
Defeza : Dr. Filipe Landos (Advogadu Privadu)
Desizaun : Pena prizaun tinan 2 suspende ba tinan 2

Iha 05 Outubru 2023, Tribunál Judisiál Primeira Instánsia Oekusi prezide leitura akordaun ba krime kontrabandu ne'ebé envolve arguidu Toni Nomense Caet hasoru Estadu RDTL. Iha Aldeia Saben, Suku Bobometo, Sub-regiaun Oesilo, Regiaun Administrativa Espesiál Oekusi Ambeno (RAEOA).

Akuzasaun Prokuradór

Prokuradór akuza katak iha 07 Dezembru 2022, maizumenus iha oras tuku 20:30 kalan, arguidu importa mina gasolina husi Indonézia tama mai territóriu Timor-Leste ilegalmente. Iha indisius hatudu katak arguidu importa kombustivel husi Indonézia tama mai territóriu Timor-leste, la tuir Alfandega atu selu taxa ba Estadu RDTL. Kombustivel refere falun iha plastiku hamutuk lima litrus ho total mina gasolina litru 25. Depoisde kaptura arguidu, Unidade Polísia Fronteira (UPF) entrega arguidu no sasan ba PNTL Rejiaun Oekusi hodi remesa ba prokuradór atu halo prosedimentu prosesual tuir lei.

Prokuradór akuza arguidu kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu konfesa integralmente ba faktu hotu iha akuzasaun katak loos duni nia hatama duni mina gasolina litru 25 ne'ebé falun iha plastiku husi Indonézia mai territóriu Timor Leste latuir dalan legal. Depoisde akontesementu arguidu konsiente katak hahalok hanesan ne'e ladi'ak, arrepende nia hahalok, hanesan estudante laiha rendimentu fiksi kada fulan, foin primeiravés mai hatan iha tribunál, promete sei larepete hikas hahalok ne'e iha futuro.

Prokuradór husu ba tribunál atu presinde testemuña nia depoimentu no husi parte defeza laiha opsau. Tanba ne'e, tribunál bazeia ba pedidu ne'e no presinde testemuña nia depoimentu ho konsiderasaun katak durante iha produsaun ba prova arguidu rasik konfesa faktu hotu iha akuzasaun.

Alegasaun finál

Prokuradór intende katak laiha duvida ba faktu hotu iha akuzasaun tanba iha produsaun ba prova arguidu rasik konfesa integralmente. Prokuradór konsidera arguidu nia hahalok ne'e priense duni elementu krime kontrabandu no husu ba tribunál atu kondena arguidu tuir artigu 316 KP ho pena prizaun tinan ida suspende ba tinan ida.

Entretantu defeza haktuir katak durante iha produsaun ba prova arguidu kolabora diak ho tribunal hodi konfesa integralmente ba faktu hotu iha akuzasaun. Depoisde akontesementu arguidu konsiente katak hahalok hanesan ne'e ladi'ak, arrepende nia hahalok, hanesan estudante laiha rendimentu fiksi kada fulan, foin primeiravés mai hatan iha tribunál no promete sei larepete hikas hahalok ne'e iha futuro. Tanba ne'e defeza husu ba tribunál atu fo kastigu tuir arguidu sira nia sala.

Desizaun

Depoisde avalia faktu hotu ne'ebé produs durante iha julgamentu, tribunál konsidera arguidu nia hahalok ne'e provadu no priense duni elementu krime kontrabandu.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru. Tanba ne'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

2. Krime violasaun ba justisa nia segredu

Nú. Prosesu : 0061/21.PDOEC
Kompozisaun Tribunál : Kolektivu
Juis : Dra. Florençia Freitas
: Dr. Argentino Luisa Maria Nunes
: Dr. Benjamin Barros
Prokuradór : Dr. Mateus Nesi
Defeza : Dr. Manuel Expostu (Advogadu Privadu)
Desizaun : Absolve

Iha 05 Outubru 2023, Tribunál Judisiál Primeira Instánsia Oekusi prezide leitura akordaun ba krime violasaun ba justisa nia segredu ne'ebé envolve arguidu Hermenegildo Sipa hasoru Estadu RDTL. Iha Suku Costa, Sub-regiaun Pante-makasar, Regiaun Administrativa Especial Oekusi Ambeno (RAEOA).

Akuzasaun Prokuradór

Prokuradór akuza katak iha 10 Juñu 2021, arguidu fó sai informasaun iha nia pajina facebook kona-ba "visum obrigatóriu" katak "labarik feto ne'e, la hetan aktu abuzu seksuál husi arguidu (RD) maibé labarik feto ne'e hetan visum obrigatóriu.

Tuir mai iha 26 Juñu 2021, arguidu espalla tan informasaun kona-ba labarik feto nia idade. Iha 02 Jullu 2021, arguidu espalha tan informasaun kona-ba advogadu privadu hatama keixa. Tuir mai arguidu fó sai tan informasaun iha 05 Jullu 2021 kona-ba keixa refere.

Ikus liu iha 08 Jullu 2021, arguidu espalla tan informasaun kona-ba nia dúvida ho assinatura visum nian.

Prokuradór akuza arguidu kontra artigu 291 KP kona-ba krime violasaun ba justisa nia segredu ho moldura penál tinan 2 too tinan 6.

Produsaun ba prova sira

Iha julgamentu arguidu deklara katak faktu sira ne'ebé hakerek iha akuzasaun ne'e la'os nia mak espalla iha média sosial. Momentu ne'ebá kazu ne'e viral tebes no ho nia kronolojia ne'ebé luan ou naruk demais maka arguidu ho iniciativa hakarak atu habadak kronolojia husi kazu ne'e hodi publika iha nia facebook rasik. Arguidu hatuir tan katak la

hatene se maka fahe tutan nia postingan ne'e ba iha grupu asosiasaun nian. Razaun arguidu halo ida-ne'e tanba hanesan Oekusi oan, haree vídeo ne'ebé fó sai iha média Oekusi kona-ba labarik sira ne'ebé la satisfeitu ho visum obrigatóriu ne'ebé tuir loloos laos sira maka sai vítima ba iha abuzu seksuál husi arguidu maibé sira halo visum obrigatóriu, ho nune'e maka arguidu hakarak halo komentáriu relasiona ho aktu refere. Arguidu mós deklarata katak nia la halo komentáriu ba iha violasaun seksuál maibé kona-ba visum obrigatóriu deit. Arguidu serbisu hanesan proffesor no foin primeiravés mai hatan iha tribunál.

Alegasaun finál

Prokuradór konsidera hahalok arguidu provadu no priense duni elementu krime violasaun ba justisa nia segredu ne'ebé previstu no punidu iha artigu 291 Kódigu Penál. Nune'e prokuradór husu ba tribunál atu kondena arguidu tuir pena ne'ebé hakerek ona iha akuzasaun atu iha futuro arguidu larepete nia hahalok no ema seluk labele halo tuir.

Enkuantu defeza husu ba tribunál atu absolve arguidu husi akuzasaun prokuradór nian tanba laos nia mak publika direta maibé depoisde haree vídeo ne'ebé fó sai iha media kona ba labarik sira ne'ebé la satisfeitu ba visum obrigatóriu ne'e hodi arguidu ho nia iniciativa rasik halo konkluziun badak ba informasaun ne'ebé nia asesu no fó sai iha arguidu nia facebook.

Desizaun

Depoisde avalia faktu hotu ne'ebé produs durante julgamentu, tribunál konsidera arguidu nia hahalok ne'e la-provadu no la-priense elementu krime violasaun ba justisa nia segredu. Tanba ne'e, tribunál konklui prosesu ne'e no absolve arguidu husi krime refere.

3. Krime kontrabandu

Nú. Prosesu : 0033/23.OESIC
Kompozisaun Tribunál : Kolektivu
Juis : Dra. Florençia Freitas, Dr. Benjamin Barro no Dr. Argentino Luisa Maria Nunes
Prokuradór : Dr. Pedro Baptista Aleixo dos Santos
Defeza : Dr. Filipe Landos (Advogadu Privadu)
Desizaun : Pena prizaun tinan 2 suspende ba tinan 2

Iha 05 Outubru 2023, Tribunál Judisiál Primeira Instáncia Oekusi prezide leitura akordaun ba krime kontrabandu ne'ebé envolve arguidu Felisiano Afoan no Rosario Manten hasoru Estadu RDTL, Iha Aldeia Noque, Suku Naimeco, Sub-regiaun Pante-Makasar, RAEOA.

Akuzasaun prokuradór

Prokuradór akuza katak iha 06 Fevereiru 2023, maizumenus iha oras tuku 09:00 dadeer, arguidu sira hamutuk importa motorizada ida ho marka Honda revo fit, kor metan, laiha espelu, laiha dokumentu legais no seidauk rejistu, maibé sirkula ona iha estrada públiku. Arguidu Felisiano Afoan, hola motorizada mensionadu husi ema

Indonézia iha Fronteira Oesilo ilegalmente ho valor USD\$600.00. Arguidu sira importa motorizada tuir dalan ilegál ho objetivu atu labele selu taxa ba Estadu RDTL liuhusi diresaun Alfandega.

Prokuradór akuza arguidu sira kontra artigu 316 KP kona-ba krime kontrabandu ho moldura penál tinan 2 too tinan 6 ka multa.

Produsaun ba prova sira

Iha julgamentu, arguidu sira konfesa integralmente ba faktu hotu iha akuzasaun no hatene hahalok hanesan ne'e ladi'ak no arrepende sira nia hahalok. Arguidu sira deklara katak motorizada ne'e sosa husi ema ida husi Indonézia hodi lori tama mai ilegálmente, arguidu sira serbisu hanesan to'os na'in laiha rendimentu fiksi kada fulan, arguidu sira foin primeiravés mai hatan iha tribunál, promete sei larepete hikas hahalok ne'e iha futuro.

Prokuradór husu ba tribunál atu presinde testemuña nia depoimentu no husi parte defeza laiha opsaun. Tanba ne'e, tribunál bazeia ba pedidu ne'e no presinde testemuña nia depoimentu ho konsiderasaun katak durante iha produsaun ba prova arguidu sira rasik konfesa faktu hotu iha akuzasaun.

Alegasaun finál

Prokuradór hanoin katak laiha duvida ba faktu hotu iha akuzasaun tanba iha produsaun ba prova arguidu sira rasik konfesa faktu hotu iha akuzasaun. Prokuradór konsidera arguidu sira nia hahalok ne'e priense duni elementu krime kontrabandu no husu ba tribunál atu kondena arguidu sira ho pena prizaun tinan 2 suspende ba tinan 2 ba kada arguidu.

Alende ne'e, husi parte defeza afirma katak durante iha produsaun ba prova arguidu sira kolabora diak ho tribunál, arguidu sira konfesa faktu hotu no rekoñese duni sira nia sala no arrepende sira nia hahalok. Haree mós ba situasaun moris arguidu sira nian ho vida agrikultor ne'ebé laiha rendimentu fiksi kada fulan. Tanba ne'e, husi parte defeza husu ba tribunál atu aplika pena ne'ebé mak justu no adekua ba arguidu na'in rua.

Desizaun

Depoisde avalia ba faktu hotu ne'ebé produs durante julgamentu tribunál konsidera hahalok arguidu sira nian ne'e provadu priense duni elementu krime kontrabandu. Tribunál mós prova liután katak hahalok arguidu sira nian ne'e hanesan dolu direitu tanba arguidu sira mak ho hakarak rasik importa motorizada refere husi nasaun Indonézia tama mai territóriu Timor-Leste liuhusi dalan ilegál.

Bazeia ba faktu provadu sira ne'e hotu no tetu mós ba sirkunstánsia agravantes no atenuantes sira ne'ebé haleu krime ne'e. Tribunál konklui prosesu ne'e no kondena arguidu sira ho pena prizaun tinan rua suspende ba tinan rua ba kada arguidu.

Atu hetan informasaun kompleitu, favór kontaktu:
Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl